

LISTOVI

**GRAČANIČKI
GLASNIK**
časopis za kulturnu
historiju

Broj 39, godina XX,
maj, 2015. [str. 199-208]

© Monos 2015

Listovi gračaničkog kalendara od 01. 11. 2014. do 31. 04. 2015.

Dr. sc. Omer Hamzić

05. 11. 2014.

Učenici Mješovite srednje škole obnavljaju gračaničkog “Ćiru”

Gračanički “Ćiro”, stara parna lokomotiva, identična onoj kakva je nekada vukla terentne i putničke vagona na pruzi od Gračanice do Karanovca, stigla je u ovaj grad 1981. godine iz rudnika u Banovićima, jedva 13 godina nakon što je gračanička željeznica ukinuta. Nostalgija za starim “Ćirom” je bila tolika da su mnogi lokomotivu iz iste serije, ali nešto mlađi model, poistovjećivali sa onim koji je prometovao iz Gračanice do Karanovca. Vremenom je “Ćiro” postao jako zapušten, neuredan, svojevrsno gradsko ruglo. Nekoliko godina nakon završetka rata, lokomotiva je, na inicijativu poteklu iz kruga saradnika *Gračaničkog glasnika* i uz angažovanje tadašnjeg rukovodstva Fondacije za zaštitu kulturno-historijskog naslijeđa “Soko” – obnovljena i premještena na pogodniju lokaciju, te postavljena na uređenu platformu sa željezničkim ši-



Fotografija: Radio Gračanica

LISTOVI

nama. Prošlo je od tada desetak i više godina, a "Čiro" je, zbog izloženosti atmosferskim a nebrizi lokalne zajednice – ponovo počeo stradavati, na veliku žalost rijetkih ljubitelja kulturnog naslijeđa i starih željeznica, koji su upozoravali da je ovakvim, skoro pa unikativnim spomenicima historije i tehnike mjesto u muzejima, a ne pod otvorenim nebom. Dalje je propadanje "Čire" spriječeno zahvaljujući svijesti uprave i nastavnog osoblja Mješovite srednje škole u Gračanici. Grupa od trinaest učenika ove škole (smjer zavarivači), pod nadzorom predmetnih nastavnika Arifa Imamovića i Samira Čajića, početkom novembra poduzeli su akciju i očistili izloženu lokomotivu, skinuli koroziju, otklonili kvarove i nanijeli novu boju. "Čiro" je tako ponovo zasijao u punome sjaju – kao jedan od simbola Gračanice, atrakcija za goste i turiste, ali ujedno i spomenik (ne)zaboravljenoj željezničkoj tradiciji ovoga grada.

07. 11. 2014. 250.000 KM za stambeno zbrinjavanje Roma...

Austrijska humanitarna organizacija "Hilfswerk International" osigurala je, uz učešće Općine Gračanica od 50.000 KM, donatorska sredstva za sanaciju stambenih objekata romske populacije, na osnovu kojih su potpisani ugovori sa 12 romskih porodica s područja Škahovice, Donje Orahovice i Grabovca. Najavljeno je da će radovi biti okončani u što kraćem roku, kako bi romske porodice zimu provele u obnovljenim objektima.

09. 11. 2014. ...i 107.000 KM za objekte stradale u prirodnim nepogodama

Na svojoj vanrednoj sjednici, Vlada Tuzlanskog kantona je usmjerila 500.000 KM za pomoć porodicama, čiji su stambeni objekti uništeni uslijed elementarnih nepogoda (poplave i klizišta). Sredstva su dobivena od

Federacije BiH, tačnije od Fonda za pomoć nastradalim područjima od prirodne nesreće na teritoriji FBiH. Općini Gračanica odobreno je 107.000 KM, uz preporuku da općinska izvršna vlast utvrdi kriterije za odabir i raspíše javni poziv za dodjelu spomenutih sredstava.

17. 11. 2014. Održana konstituirajuća sjednica Skupštine Tuzlanskog kantona

Uručenjem uvjerenja o dodjeli mandata poslanicima Skupštine TK konstituiran je VII saziv ovog predstavničkog tijela. U skupštinskim klupama u mandatnom periodu 2014.-2018. sjedit će i trojica poslanika iz Gračanice: Mirza Omerdić (SDA), Vehid Osmanović (SDP) i Demir Beganović (DF).

20. 11. 2014. Odlukom Općinskog vijeća Gračanica, dodijeljeni placevi za 11 porodica Lukavice, čiji su stambeni objekti trajno stradali u poplavama tokom maja i avgusta ove godine

Placevi su približno iste veličine, a nalaze se na lokaciji u neposrednoj blizini osnovne škole u Lukavici. Uposlenici Službe za prostorno uređenje, imovinsko-pravne i geodetske poslove Općine Gračanica izvršili su obilježavanje granica parcela na terenu i direktan uvid korisnika u dodijeljene parcele. Na taj način stvoreni su preduvjeti za pripremu i početak gradnje novih stambenih objekata.

26. 11. 2014. Održana 25. sjednica Općinskog vijeća: odluka o izmjenama i dopunama budžeta Općine Gračanica za 2014. godinu.

Predloženi budžet po rebalansu veći je za 939.420 KM i iznosi 13.164.247 KM, a čine ga: višak prihoda iz prethodnih godi-

na 791.827 KM i prihodi 11.097.420 KM (porezni prihodi 6.340.000 KM, neporezni 2.004.420 KM, tekući grantovi 2.753.000 KM i primici 1.275.000 KM). Razlog povećanja obima Budžeta su povećane tekuće potpore za sanaciju posljedica prirodne nesreće (poplave i klizišta), te povećana sredstva građana koja su uplaćena za neke kapitalne projekte kao što su vodovodi u Vranovićima, Trnovcima Donjoj Lohinji i Doborovcima, te putevi Babići – Vis, Donja Lohinja–Gornja Lohinja, Soko-Oštrikovac i Gornji Doborovci). Od ostalih tačaka dnevnog reda, izdajamo Odluku o obavljanju volonterskog rada nezaposlenih osoba visoke stručne spreme sa područja općine Gračanica u organu uprave i pravnim subjektima iz javnog i privatnog sektora, kojom je predviđen prijem na volonterski rad maksimalno 40 osoba.

1.12. 2014.

Asfaltirana i puštena u promet dionica puta prema Gornjoj Lohinji

Time je obezbijedena lakša komunikacija i izlazak mještana s tog područja na magistralni put M4 Doboj – Tuzla. Vrijednost projekta je 205.000 KM, a sredstva su osigurana iz tzv. GSM licence. Učešće mještana je 25.000 KM. S obzirom da se radi o povratničkom naselju, očekuje se da će se ovom saobraćajnicom ubrzati i povratak predratnog srpskog stanovništva.

18. 12. 2014.

Promocija 38. broja Gračaničkog glasnika: u znaku gračaničkih pjesnika

U prijatnom ambijentu Biblioteke “Dr. Mustafa Kamarić” u Gračanici, sadržaj broja predstavio je član Redakcije Edin Šaković, a zatim su svoje stihove govorili članovi “Pjesničkog kruga *Gračaničkog glasnika*”: Amir Mašić, Edvin Mujinović Galeb, Nisveta Kantardžić, Muhamed Dautović i Jakub Džafić.



O dometima poezije gračaničkih pjesnika govorio je dr. sc. Omer Hamzić, a zatim se povela zanimljiva rasprava o načinu organiziranja i aktivnijeg angažmana književnika i ljubitelja pisane riječi u Gračanici.

18. 12. 2014.

Premijera pozorišne predstave “Skidajte se do kraja”

Prema popularnom britanskom filmu “Skidajte se do kraja” (“The Full Monty”, 1997.), gračanička rediteljka Mirela Trepanić (diplomirala režiju na Akademiji scenskih umjetnosti u Sarajevu i već stekla zavidan renome u sarajevskim pozorišnim krugovima) postavila je istoimenu predstavu u kojoj igraju članovi dramske sekcije KUD-a “Adem Alić”: Adnan Ahmedbegović, Miralem Džaferović, Albina Junuzović, Maja Avdagić, Esad Grbešić, Mirza Grbešić i Smajo Hasić. U predstavi je zadržana osnovna radnja filma – skupina nezaposlenih muškaraca nakon bezuspješnog traganja za poslom odlučuje se u beznadu za striptiz – ali su mnogi drugi

elementi prilagođeni bosanskohercegovačkoj situaciji i lokalnoj sredini. Predstava je, već uoči premijere, izazvala veliko interesovanje gračaničke publike, te je u toku premijere i prve reprize (dan poslije) velika sala BKC-a bila potpuno rasprodana. Predstava je kasnije izvedena još triput u Gračanici (u januaru, februaru i aprilu 2015.), dok je tokom marta gostovala u Žepču, Sarajevu i Tešnju, kao jedan od najuspješnijih kulturnih projekata iz Gračanice.

22. 12. 2014.

Promocija romana "Inkapsulirana tijela"

U Omladinskom centru "Anea" u Gračanici promoviran je roman "Inkapsulirana tijela" Nedžada Ibrahimovića. Promotori su bili gračanički profesori Mehmed Nurikić i Fatima Bećarević, a prisutnima se obratio i sam autor, inače profesor književnosti na Filozofskom fakultetu u Tuzli i nedavno izabrani predsjednik PEN Centra Bosne i Hercegovine.

24.12.2014.

Najbolji sportisti općine Gračanica u 2014. godini: Alen Šako i Belma Mujanović

Organizator ovogodišnje manifestacije bio je Sportski savez, a pokrovitelj Općina Gračanica. Za najuspješnije sportiste općine u 2014. proglašeni su: **Belma Mujanović**, članica Karate kluba "Gračanica" (državna prvakinja, najuspješnija takmičarka među 122 registrovana kluba u Karate savezu BiH i članica Karate reprezentacije BiH), te **Alen Šako**, član Nogometnog kluba "Mladost" iz Malešića (jedan od najboljih igrača i strijelaca u ekipi, koji je izaborio nastup i u Amaterskoj nogometnoj reprezentaciji Tuzlanskog kantona, sa

kojom će igrati i u završnici evropskog Kupa regija 2015. u Portugalu). Za najuspješnije sportske kolektive u proglašene su ekipe NK "Mladost" iz Malešića i Ženski odbojkaški klub "Gračanica". U omladinskim kategorijama dobitnici priznanja su: **Adna Mujić** (Krate klub "Lavovi") i **Omer Mehmedović** (RK "Gračanica") kao najbolji pioniri, **Selma Mešić** (ŽOK «Gračanica») i **Hasan Mujanović** (NK "Bratstvo") kao najbolji kadeti, te **Samir Šišić** (NK "Bratstvo") i **Azra Hasić** (ŽOK "Gračanica") kao najbolji u juniorskoj konkurenciji. U kategoriji najuspješnijih škola nagradu je osvojila O.Š. Džakule, a **Sanel Zaketović** je dobitnik nagrade za najuspješnijeg nastavnika tjelesnog odgoja. Za najuspješnijeg sportskog radnika proglašen je **Nedim Musić**, predsjednik RK "Gračanica", a za najboljeg trenera **Ferid Imamović** iz NK "Mladost" Malešići. Dodijeljene su i nagrade za doprinos uspješnoj realizaciji sportskih manifestacija, te više priznanja za doprinos razvoju i afirmaciji sporta.

27. 12. 2014.

Muzička manifestacija "Gračaničke zvjezdice"

U Velikoj sali BKC-a održan je takmičarski muzički nastup pod nazivom "Gračaničke zvjezdice pjevaju pop-rock hitove", na kome se predstavilo 19 učenica i učenika gračaničkih osnovnih škola. Stručni žiri (prof. Miralem Mejremić, prof. Alma Kurtić, Mirela Trepanić, Nermin Bećirević i Vedad Osmanbegović) je odabrao tri najbolja mlada izvođača (Lejla Vražalica – prvo mjesto, Elvira Aljić – drugo i Samra Hasić – treće mjesto), koji su primili novčane nagrade, dok su ostalim učesnicima uručene zahvalnice i novogodišnji paketići. "Gračaničke zvjezdice" su se ponovo predstavile najmlađoj publici na otvorenoj sceni u centru grada, 30. 12. 2014. godine.

29. 12. 2014.

Održana 26 sjednica Općinskog vijeća: usvojen Budžet Općine za 2015. (u iznosu od 13,5 miliona KM, Program rada Općinskog vijeća i Općinskog načelnika za 2015., te Odluka o provođenju Prostornog plana Općine Gračanica 2006.-2026.

Nakon što su razmotreni i djelimično ili u cjelosti usvojeni amandmani pristigli od strane vijećnika, klubova vijećnika i Općinskog načelnika, budžet za 2015. godinu se povećao na cifru od 11.374.500 KM. Iznos od dodatnih 85.000 KM za kojim se ukazala potreba nakon usvojenih amandmana bit će obezbijeden dodatnim zaduženjem i brisanjem jedne manje stavke. Od značajnijih projekata koji će se finansirati iz ovog budžeta izdvajamo: otklanjanje posljedica elementarnih nepogoda, sanaciju klizišta i gradnju stambenih objekata, nastavak gradnje sportske sale, javna rasvjeta u centru grada i parkovima itd. U nastavku sjednice jednoglasno je usvojena Odluka o pristupanju Općine Gračanica u članstvo Lokalne akcione grupe (LAG) regije Doboje, kao i Plan sanacije gradskog građevinskog zemljišta, te Informacija o stanju zaštite građana od neeksplozivnih sredstava na području općine Gračanica u 2014. godini

08. 01. 2015.

Kolektori za proizvodnju sunčeve energije na Sportskoj sali "Luke" u Gračanici

Riječ je o fotonaponskoj solarnoj elektrani snage 10 KW koja će proizvoditi energiju za dogrijavanje vode u sistemu zagrijavanja i za rasvjetu. Vrijednost nabavljene i instalirane opreme iznosi 78 hiljada KM. Garancija na opremu je 25 godina, a po predviđenoj dinamici otplaćuje se za deset godina. Sredstva su

obezbijedena kroz projekat "Zaštita prirode i globalizacija obnovljivih izvora energije "Progres", kojeg finansira Evropska unija kroz IPA program prekogranične saradnje Hrvatska-BiH.

14. 01. 2015.

Direktor Federalnog fonda za pomoć nastradalim područjima od prirodne nesreće u posjeti Gračanici: novih 190.000 KM za ovu općinu

Na sastanku sa načelnikom i predstavnicima općine, koji su goste upoznali sa problemima vezanim za sanaciju infrastrukture oštećene posljedicama elementarnih nepogoda, direktor Fonda Jasmin Jaganjac je razgovarao o projektima u okviru kojih su realizirana sredstva pomoći Fonda, te o sličnim projektima planiranim za naredni period. Istaknuo je da su općini Gračanica odobrena nova sredstva u iznosu od 190.000 KM (za sanaciju mostova u Rašljevi, mosta na Lukama, klizišta Golaći u Malešićima i tri stambena objekta), ukazavši i na brojne mogućnosti povlačenja sredstava iz drugih domaćih i stranih fondova namijenjenih sličnim potrebama.

15. 01. 2015.

Za Dan vozača – mimohod kamiona gračaničkim ulicama

Dan vozača i automehaničara, jedan od danas neoficijelnih, popularnih datuma, čija tradicija datira iz vremena socijalističke Jugoslavije, po prvi put je javno obilježen i u Gračanici. Na inicijativu vozača iz nekoliko gračaničkih firmi, petnaestak kamiona se u koloni provezlo gračaničkim ulicama, uz zvuke sirena, izazvavši značajnu pažnju i odobravanje građana. Za očekivati je da će se tradicija obilježavanja Dana vozača iz nekadašnjih vremena nastaviti, uz još masovniji odziv učesnika.

29. 01. 2015.**Održana 27. sjednica Općinskog vijeća: vladajuća većina nije usvojila inicijativu SDA da se deprofesionalizuje funkcija predsjedavajućeg Općinskog vijeća i tako ostvare značajne uštede**

Inicijativu je pokrenulo i u redovnu proceduru uputilo 12 vijećnika SDA, sa jasnom porukom da bi se ukidanjem ove profesionalne funkcije ostvarile značajne uštede i dokazala iskrena opredijeljenost Vijeća za politiku štednje koja se stalno zagovara. *Protiv* je bila tzv. vladajuća većina od 18 vijećnika, koju čine: SDP, Naša stranka, Liberali i samostalni vijećnici BPS-a, koja je inicijativu ocijenila kao "politikanstvo", što je izazvalo oštre osude u lokalnoj javnosti. Pošto su se bili dobro "zadeverali" ovom inicijativom, ostale tačke dnevnog reda za vijećnike su bile takoreći u drugom planu, iako se radilo o nekim značajnim imenovanjima, stanju sigurnosti, izmjeni značajnih akata nekih javnih preduzeća itd. Vijećnici kao da nisu ni obračali puno pažnje, pa su i usvojene bez ikakvih problema.

20. 02. 2015.**Nakon četiri mjeseca od izbora, potvrđena nova Vlada Tuzlanskog kantona: tri ministra iz Gračanice**

Mandatar vlade Bego Gutić sastavio je vladu koju čine SDA i njeni koalicioni partneri: Demokratska fronta, Bosanska patriotska stranka i Narodna stranka Radom za boljitak. Na funkciji u ovoj vladi bit će i tri ministra iz Gračanice: **Hasan Fehratović** (SDA), kao ministar prostornog uređenja i zaštite okoliša, zatim **Admir Huskanović** (DF), kao ministar za rad, socijalnu politiku i izbjeglice, te **Elvis Bektić** (BPS), ministar zdravstva.

25. 02. 2015.**Nova klizišta na području općine Gračanica i Doboj Istok**

Na području Tuzlanskog kantona u zadnjim su se februarskim danima pojavila brojna nova i aktivirala stara klizišta. U Kantonalnoj upravi civilne zaštite saopštili su da je najteža situacija u općini Gradačac, gdje su evidentirana čak 142 klizišta, te da su nova pomjeranja zemljišta zabilježena i u Čeliću, Gračanici, Kalesiji, Doboj Istok. Prema izvještaju Općinskog štaba Civilne zaštite Gračanica, na području ove općine došlo je do reaktiviranja četiri i pojave jednog novog klizišta. Reaktivirana su klizišta u Malešićima, od kojih jedno ugrožava mezarje, klizište u Škahovici, koje ugrožava jedan stambeni objekt, zatim dva klizišta u naselju Lukavica, koja ugrožavaju takođe jedan stambeni objekt, te jedno novo klizište u Gračanici, koje ugrožava jedan vikend-objekt. Na području općine Doboj Istok došlo je do aktiviranja četiri nova klizišta, od čega dva u Mjesnoj zajednici Klokočnica i dva u Mjesnoj zajednici Lukavica Rijeka, ali ona na svu sreću ne ugrožavaju stambene i druge objekte.

25. 02. 2015.**Održana 28. sjednica općinskog vijeća Gračanica: formiranje revizorske službe**

Na početku sjednice opozicioni Klub vijećnika SDA izašao je sa inicijativom da se pod hitno uvrsti u dnevni red i pitanje smanjivanja ili potpunog ukidanja vijećničkih paušala, kao i visine plata rukovodilaca u javnim ustanovama i preduzećima. Inicijativa je glasovima vladajuće većine odbijena, iz "principijelnih i poslovnih razloga", te ostavljena za neku drugu priliku. U nastavku sjednice usvojena je Odluka o pretpostavkama, na-

čelima i načinu izrade programa kapitalnih investicija općine Gračanica za period 2015.-2020., te Odluka o izmjenama i dopunama odluke o osnivanju službi za upravu općine Gračanica, po kojoj se u ovoj općini osniva interna revizija, pošto, kako je obrazloženo, zakon nalaže svakoj općini sa budžetom većim od 10 miliona KM da mora imati internu reviziju. Usvojeni su i prijedlozi plana upisa učenika u prvi razred gimnazije "Dr. Mustafa Kamarić" (po kojem će u ovu školu u narednoj školskoj godini biti upisano 120 učenika u 4 odjeljenja), odnosno Mješovite srednje škole Gračanica (koja će upisati 20 odjeljenja). Vijećnici su, u slučaju Mješovite srednje škole, imali i nekoliko pitanja vezanih za kriterije kojima se uprava škole vodi prilikom odabira planiranih zvanja i zanimanja. Do kraja sjednice, usvojena je i Informacija o stanju zaštite od požara i vatrogastva, praćenja i izvršenja plana zaštite od požara na području općine Gračanica u 2014. godini.

01. 03. 2015.

Premинуo Atif Kujundžić, dugogodišnji saradnik "Gračaničkog glasnika"

Iako je duže vremena bio teško bolestan (takoreći nepokretan), Atif Kujundžić se nije predavao. Iz njegove književne i spisateljske radionice skoro svakodnevno su izlazili angažovani publicistički tekstovi, komentari i kolumne, prikazi knjiga, eseji, literarni ra-

dovi. U posljednje vrijeme, u općoj krizi izdavaštva, bio je veoma prisutan na nekoliko angažovanih web-portala i on-line izdavača, gdje je objavio i nekoliko svojih knjiga u elektronskoj formi. Zato nas je tužna vijest da smo zauvijek izgubili čovjeka velikog srca i još većeg književnog i spisateljskog opusa, htjeli ne htjeli – iznenadila. Svi njegovi prijatelji nadali su se da će se uspjeti još dugo nositi sa bolešću koja ga je sve više pritiskala. Između ostalih svojih mnogobrojnih poslova, zanimanja i interesovanja, bio je i član redakcije ovog časopisa, skoro od samog osnivanja, jedan od najboljih njegovih saradnika. Mnogim svojim pametnim prijedlozima, kritikama i sugestijama dao je veliki doprinos programskom profiliranju i stabilizaciji ovog glasila. Zadnji puta oglasio se u 37. broju... Nismo ni slutili da je to njegov posljednji prilog na stranicama našeg časopisa. Atif Kujundžić, književnik i publicist, dugogodišnji saradnik i član redakcije "Gračaničkog glasnika", rođen je u Gračanici, 1947. godine, ali je najveći dio svog radnog i životnog vijeka proveo u Lukavcu. Objavio veći broj knjiga poezije i proze. Bio je posebno plodan pisac za djecu, zastupljen i u lektiri za osnovne škole. Autor je i više stotina eseja, prikaza, osvrtata, recenzija, komentara... (opširnije u rubrici "Riječ" u ovom broju našeg časopisa)ntara, reportaža i članaka, uglavnom s područja umjetnosti, kulture i društva. Suradivao je sa više časopisa i web-portala, a u "Gračaničkom glasniku" objavljuje već u prvom našem godištu. Bio je i glavni urednik, te jedan od koautora fotomonografije "Gračanica: općina, grad, ljudi" (2006.), koja je do danas ostala jedina publikacija tog tipa objavljena u našem gradu.

03. 03. 2015.

Postavljeni parking-automati u Gračanici – ali još ne rade

Dugo najavljivano postavljanje automata za naplatu parkinga u Gračanici (ka-



kvi već odavno postoje u nekim susjednim gradovima) izvršeno je početkom marta, ugradnjom ukupno devet uređaja – četiri na Keju, tri u Ulici 22. divizije, jedan u ulici Ahmed-paše Budimlije, te dva u ulici Riječka. Nakon postavljanja, međutim, automati nisu pušteni u rad, jer nije riješeno ko će njima upravljati (!) – naime, naplatu parkinga trenutno vrši jedno od boračkih udruženja, putem firme koju je iz tih razloga posebno registriralo, da bi se sa postavljanjem automata pronijela vijest da će naplatu preuzeti javno preduzeće “Komus”. To je izazvalo buru negodovanja među boračkom populacijom. Automati od tada stoje – i ne rade, čekajući da lokalna vlast riješi pitanje upravljanje parkinzima u gradu. Valjda parking-automati neće doživjeti sudbinu gračaničkih semafora. Rahmetullahi alejhi rahmeten vasieten!

10. 03. 2015.

Klizište prekinulo vezu Džakula sa Gračanicom na padinama Monja

Klizište na sjevernim padinama uzvišenja Monj, kojima se spušta lokalna asfaltna cesta od Dobrovaca za sela Džakule, Trnovce i Prijeko Brdo, pokrenuto je još 2014. godine, kao posljedica obilnih proljetnih padavina. Tada su izvedene najnužnije sanacione mjere kako bi se osigurala kakva-takva prohodnost, ali su se prognoze stručnjaka da neće doći do trajnog zaustavljanja kretanja tla, nažalost, pokazale istinitim. Klizište na Monju sve više poprima oblik prirodne katastrofe, jer su, uz veliki prečnik padine koja klizi, ugroženi i stambeni objekti jednog dijela sela Džakule, sa školom i džamijom. Geolozi procjenjuju da je teren jako zahtjevan, da je klizište obuhvatilo veliku površinu i prostorno i u dubini zemlje, te da se može očekivati samo dalja reakcija prirode. Ekipe sa mehanizacijom mogu tek ublažiti posljedice koje će načiniti pomjeranje tla na ovoj lokaciji. “Ovo je samo jedno od klizišta koje je reaktivirano u ovoj godini, uz brojna druga manjeg obima od

Lukavice do Gornje Orahovice. Ekipe Civilne zaštite su stalno na terenu i prate situaciju jer u ovakvim slučajevima osim osiguranja i zaštite ljudskih života, teško je bilo šta drugo poduzimati”, izjavio je za Radio Gračanicu Mustafa Bajić, šef Općinske službe civilne zaštite Gračanica. Prekid veze između Dobrovaca i Džakula će možda aktualizirati ideje i prijedloge o povezivanju kotline Džakulske rijeke trasom starih kolskih puteva koji preko Serhatlija izlaze na Bukvu, a do tada – sigurna cestovna veza do Džakula, Trnovaca i Prijekog Brda vodi zaobilaznim putem iz pravca Gradačca, preko Srnica i Biberova Polja, što ova sela udaljava od centra općine za više od 20 kilometara.

24. 3. 2015.

“Zlatna libela” za gračaničku firmu “Kovan”

Riječ je o još jednom u nizu priznanja koja se skoro redovno dodjeljuju ovoj uglednoj gračaničkoj firmi na prestižnim međunarodnim sajmovima i smotrama. Ovaj put priznanje za tehnološka dostignuća u razvoju kotlova i kamina na pelet “Kovanu” je dodijeljeno na 19. Međunarodnom sajmu građevinarstva “Grames” i Međunarodnom sajmu dostignuća u elektro i mašinskoj industriji “Demi” u Banjaluci. Mnoge inovacije iz proizvodnog programa ove firme izazvale su veliko interesovanje posjetilaca ovog sajma. Vlasnik “Kovana” Said Karalić je izrazio zadovoljstvo postignutim poslovnim aranžmanima na banjalučkom sajmu, najavljujući više inovacija i pozitivnih iznenađenja i na predstojećem gračaničkom sajmu poduzetništva i obrta “Grapos expo 2015”.

26. 3. 2015.

Novе količine vode u Donjoj Orahovici

Radi se završetku radova na istražnoj bušotini u zaseoku Rijeka (dubina 140 metara) iz

koje će se u vodosistemu ovog najvećeg seoskog naselja po broju stanovnika na općini, nakon finalnih radova, obezbijediti najmanje tri litra pitke vode u sekundi. Sa ovom bušotinom, prema prognozama stručnjaka, problem vodosnabdijevanja pojedinih dijelova ovog sela (posebno Rijeke) bit će definitivno skinut s dnevnog reda. Radovi se finansiraju iz Budžeta općine Gračanica.

26. 3. 2015.

Proizvođač liftova “Europrost” iz Gračanice na sajmu u Istanbulu

Riječ je o vodećem međunarodnom sajmu liftova i opreme za unutarnji transport ljudi i roba “Asansor 2015”, na kojem BiH predstavlja ova ugledna firma iz Gračanice (Miričina). Izlažući na ovom sajmu “Europrost” se na najbolji način priprema za izlazak na rusko, kao i tržište zemalja Bliskog Istoka, javlja Radio Gračanica.

31. 3. 2015.

Održana 29. sjednica Općinskog vijeća: nova zaduženja

Prije donošenja odluke o davanju saglasnosti općinskom načelniku da može kod komercijalnih banaka izvršiti zaduženje općine u iznosu od milion KM za realizaciju kapitalnih projekata, vijećnici su bez primjedbi usvojili izvještaj o izvršenju budžeta za 2014. godinu. Kreditna sredstva, prema pomenutoj odluci, bit će utrošena za nastavak izgradnje sportske sale, sanaciju više klizišta, završetak radova na novoj zgradi Općine, izgradnji javne rasvjete u centru grada, izgradnji vodosistema za mjesne zajednice Babići i Malešići, rekonstrukciju puteva u Pribavi, Prijekom Brdu i Gornjim Doborovcima. Do kraja sjednice usvojeni su izvještaji o radu javnih usta-

nova Dječje obdanište “Naša djeca”, Centar za socijalni rad i Bosanski kulturni centar.

02. 04. 2015.

Radionica “Kaži vezom”

Udruženje “Gračaničko keranje” iz Gračanice je bilo domaćin članicama Bosansko-hercegovačkog saveza žena u Švedskoj, sa kojima je održana radionica pod nazivom “Kaži vezom”. Gošće iz Švedske su se upoznale sa tradicionalnim kulturnim vrijednostima Bosne i Hercegovine, uključujući i tradiciju kera. Predavači su bili gosti iz Sarajeva: muzejske savjetnice Svetlana Bajić i Mevlida Serdarević, te arhivski savjetnik Sejdalija Gušić.

07. 04. 2015.

Obilježavanje 7. aprila – ozvaničen početak rada književnog kluba “Muhamed Mašić”

U povodu 7. aprila, Dana oslobođenja Gračanice u Drugom svjetskom ratu, inače jednoga od četiri datuma koji se službeno obilježavaju na općinskom nivou, gračanički književnici i ljubitelji pisane riječi okupili su se u prostorijama Narodne biblioteke “Dr. Mustafa Kamarić”, ozvaničivši početak rada Književnog kluba “Muhamed Seid Mašić”.

21.-24. 04. 2015.

Održan Šesti međunarodni sajam poduzetništva i obrta “Grapos-expo 2015”.

Na ukupno 5.200 m² zatvorenog i 15.000 m² otvorenog prostora predstavilo se blizu 300 izlagača iz šest zemalja, dok je sajam posjetilo nekoliko hiljada posjetitelja. Organizatori su, kao i ranijih godina, bili firma BOMS-expo i Općina Gračanica; sponzori su bili: BH Telecom, Kovan – Eko line i HST CNC Technik,

a pokrovitelji: Vijeće ministara BiH, Vlada FBiH, te Vlada TK. Organizatori su istaknuli da je glavni cilj sajma promocija privrede Bosne i Hercegovine i njenog neposrednog okruženja. Svečanom otvorenju sajma prisustvovali su brojni ugledni gosti, među njima ambasadorica Republike Francuske Claire Bodonyi, premijer Tuzlanskog kantona Bego Gutić, te federalni ministar razvoja, poduzetništva i obrta Amir Zukić, koji je Sajam proglasio i otvorenim; drugog dana održavanja, sajam je posjetio i Visoki predstavnik za BiH, Valentin Inzko. Osim redovnih sajamskih sadržaja, upriličene su i različite prateće aktivnosti, uključujući dva okrugla stola, te regionalnu konferenciju na temu energetske efikasnosti. Završni dan sajma, nažalost, nije protekao bez manjeg skandala, kada je uprava odlučila da sajam naprasno okonča, u znak protesta zbog navodno isuviše nametljivog prisustva inspektora Uprave za inspekcijske poslove TK, što je protumačeno kao oblik pritiska na organizatore. Iz ove uprave su, pak, poručili da su samo radili svoj posao.

30. 04. 2015.

Održana 30. sjednica Općinskog vijeća: o plaćama službenika Općine i javnim parkinzima

Vijećnici su bez veće rasprave usvojili Izvještaj o izvršenju budžeta općine Gračanica za prvi kvartal 2015. godine, odluku o javnim parking-prostorima (sa zaključkom da se firma koja će upravljati istima odredi naknadno) i nacrt odluke o dodjeli općinskih priznanja, te izvještaje o radu Doma zdravlja i Gradske apoteke, odnosno informaciju o radu Općinskog suda. Znatno veću pozornost vijećnika izazvala je Odluka o utvrđivanju platnih razreda i koeficijenata uposlenika Općine Gračanica, koja je nakon duže rasprave, pretvorena u nacrt i upućena petnaestodnevnu u javnu raspravu. Vijećnici su nakon sjednice posjetili objekt dvorane na Bazenu, kako bi potaknuli izvršnu općinsku vlast, ali i javnost na intenziviranje aktivnosti vezane za završetak radova na Dvorani.

